

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj 7/10), na prijedlog Ministarstva za prostorno uređenje, promet i komunikacije i zaštitu okoline Zeničko-dobojskog kantona, Vlada Zeničko-dobojskog kantona, na nastavku 49. sjednice, održanom 01.02.2012. godine, d o n o s i

ZAKLJUČAK

I.

Utvrđuje se Prijedlog Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona.

II.

Prijedlog Odluke iz tačke I ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____ /12.

Datum, 01.02.2012. godine

Z e n i c a

PREMIJER

mr.sci.Fikret Plevljak dipl.ing.

DOSTAVLJENO:

1x Ministarstvo za prostorno uređenje,
promet i komunikacije i zaštitu okoline,
1x Stučna služba Skupštine,
1x a/a.

Na osnovu člana 37. stav 1. tačka f) Ustava Zeničko-dobojskog kantona, a u vezi sa članom 42. Zakona o cestovnom prijevozu Federacije Bosne i Hercegovine („Službene novine Federacije BiH“, broj 28/06 i 2/10), Skupština Zeničko-dobojskog kantona, na ____ sjednici, održanoj _____. 2011.godine, donosi

**ODLUKU
O IZMJENAMA I DOPUNAMA ODLUKE
O ORGANIZACIJI I NAČINU OBAVLJANJA TAKSIPRIJEVOZA
PUTNIKA NA PODRUČJU ZENIČKO-DOBOJSKOG KANTONA**

Član 1.

(Izmjena člana 9.)

U Odluci o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10), član 9. mijenja se i glasi:

“Član 9.

- (1) Broj i razmještaj taksistajališta, broj stajališnih mjesta za taksivozila na taksistajalištima koja se nalaze na javnim površinama, kategoriju taksistajališta, ukupan broj taksivozila, odnosno ukupan broj dopunskih taksioznaka i kriterije za red prvenstva u raspoređivanju taksivozila na taksistajalištima utvrđuje svojim propisom općinsko vijeće, vodeći računa o broju stanovnika, organizovanosti javnog gradskog prijevoza, broju i razmještaju javnih institucija i objekata, općem stanju saobraćaja, dnevnoj migraciji stanovništva, konfiguraciji tla i drugim uvjetima, kao i o iskazanim potrebama korisnika prijevoza.
- (2) Ukupan broj taksivozila iz stava (1) ovog člana utvrdit će općinsko vijeće koristeći propisani zakonski omjer jedno taksivozilo na 500 - 1.000 stanovnika.
- (3) Za broj stanovnika za utvrđivanje omjera iz stava (2) ovog člana koristiće se zvanični statistički podaci.
- (4) Propis iz stava (1) ovog člana nadležna služba općinskog vijeća dužna je dostaviti Ministarstvu za prostorno uređenje, promet i komunikacije i zaštitu okoline Zeničko-dobojskog kantona (u daljnjem tekstu: Ministarstvo) najkasnije 15 dana nakon stupanja na snagu istog.”

Član 2.

(Izmjena člana 10.)

Član 10. mijenja se i glasi:

“Član 10.

- (1) Na osnovu utvrđenih kriterija iz člana 9. stav (1) ove odluke, općinski načelnik, uz prethodnu saglasnost općinskog vijeća, donijet će akt kojim će se regulisati način korištenja, red i rad na taksistajalištima, kao i raspored taksivozila na taksistajalištima.
- (2) Nadležna općinska služba dužna je Raspored taksivozila na taksistajalištima dostaviti Ministarstvu do 15. januara tekuće godine.
- (3) Taksistajalište na području jedne općine mogu koristiti samo taksiprijevoznici sa te općine.“

Član 3.

(Izmjena člana 11.)

U članu 11., stavovi (4), (5) i (6) se brišu.

Član 4.

(Dopuna i izmjena člana 12.)

U članu 12., u stavu (1), iza riječi „rasporediti“ dodaje se riječ „najviše“.
Stav (2) se briše.

Član 5.
(Izmjene člana 14.)

U članu 14., stav (2) se briše.

Dosadašnji stavovi (3), (4), (5), (6), (7), (8), (9), (10), (11), (12) i (13), postaju stavovi (2), (3), (4), (5), (6), (7), (8), (9), (10), (11) i (12).

Član 6.
(Dopuna člana 15.)

U članu 15., u stavu (2), iza riječi „taksistajalište“, stavlja se zarez i dodaju riječi: „potvrdu o registraciji za vozilo koje ima registarske tablice koje počinju slovnom oznakom “TA” ”.

Član 7.
(Dopuna i izmjena člana 16.)

U članu 16., u stavu (4), iza riječi “raspoređena“ dodaje se riječ „najviše“, a iza riječi „(dva)“ brišu se riječi: „ili maksimalno 3 (tri)“.

Član 8.
(Dopuna i izmjene člana 17.)

U članu 17., iza stava (1), dodaje se novi stav (2) koji glasi:

„(2) Uz dopunsku taksioznaku iz stava (1) ovog člana taksiprijevoznik je dužan dostaviti dokaz o odjavi registarskih tablica koje počinju slovnom oznakom “TA” za vozilo.”

Stav (6) se briše.

Dosadašnji stavovi (2), (3), (4) i (5), postaju stavovi (3), (4), (5) i (6).

Član 9.
(Brisanje člana 28.)

Član 28. se briše.

Član 10.
(Izmjena člana 33.)

U članu 33., stav (2) se briše.

Član 11.
(Brisanje člana 34.)

Član 34. se briše.

Član 12.
(Izmjena člana 35.)

Član 35. mijenja se i glasi:

“Član 35.

(Rok za donošenje propisa općinskog vijeća i akta općinskog načelnika)

- (1) Općinsko vijeće je dužno propis iz člana 9. stav (1) odluke donijeti u roku od 60 dana od dana stupanja na snagu ove odluke.
- (2) Općinski načelnik je dužan akt iz člana 10. stav (1) odluke donijeti u roku od 90 dana od dana stupanja na snagu ove odluke.
- (3) Do donošenja propisa iz stava (1) ovog člana i akta iz stava (2) ovog člana primjenjivat će se akti koji su bili na snazi do donošenja ove odluke.”

Član 13.
(Stupanje na snagu)

Ova odluka stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: _____ /11
Datum, _____ 2011. godine
Zenica

PREDSJEDAVAJUĆI
Miralem Galijašević, s.r.

O b r a z l o ž e n j e

Pravni osnov

Pravni osnov za donošenje Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona utvrđen je u članu 37. stav 1. tačka f) Ustava Zeničko-dobojskog kantona („Službene novine Federacije BiH“, broj 7/96 i „Službene novine Zeničko-dobojskog kantona“, broj 1/96, 10/00, 8/04 i 10/04) i u odredbama člana 10. i člana 42. Zakona o cestovnom prijevozu Federacije Bosne i Hercegovine („Službene novine Federacije BiH“, broj 28/06 i 2/10) u kojima je utvrđeno da će Skupština kantona svojim propisom urediti organizaciju i način obavljanja taksiprijevoza putnika na svojoj teritoriji.

Razlozi za donošenje

Skupština Zeničko-dobojskog kantona na sjednici održanoj 25.05.2010. godine donijela je Odluku o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10), (u daljnjem tekstu: Odluka).

U proceduru donošenja navedene Odluke bile su uključene sve općinske službe i Udruženje taksista u Zeničko-dobojskom kantonu.

Nakon usaglašavanja stavova pomenutih općinskih službi i Udruženja, odredbama člana 9. stav (2) Odluke propisano je da će se pri utvrđivanju ukupnog broja taksivozila iz stava (1) ovog člana nadležna općinska služba koristiti odnosom jedno taksivozilo na 1.000 stanovnika iako je članom 10. stav 3. Zakona o cestovnom prijevozu Federacije Bosne i Hercegovine propisano da pri utvrđivanju ukupnog broja taksivozila na svom području nadležni organ se može koristiti odnosom jedno taksivozilo na 500-1.000 stanovnika.

Prilikom donošenja Odluke ispoštovani su zahtjevi nekih općina da se dio ovlaštenja u vezi rasporeda taksivozila na taksistajalištima prenese na taksiodruženja iako je odredbama člana 10. stav 4. Zakona o cestovnom prijevozu Federacije BiH propisano da Skupština kantona može dio poslova iz svoje nadležnosti prenijeti na općinske organe nadležne za poslove cestovnog prijevoza, a ne na općinska udruženja taksiprijevoznika.

Primjena predmetne Odluke dovela je do nezadovoljstva dijela taksiprijevoznika koji su od Ministarstva za prostorno uređenje, promet i komunikacije i zaštitu okoline Zeničko-dobojskog kantona (u daljnjem tekstu: Ministarstvo) zahtijevali da oduzme data prava taksiodruženjima, smatrajući da su udruženja preuzela više prava nego im je dato.

Isticane su određene nepravilnosti i zloupotrebe u radu koje je Ministarstvo pokušalo riješiti održavanjem zajedničkih sastanaka svih zainteresiranih subjekata u ovoj oblasti u više navrata.

Posljednji sastanak održan je 15.04.2011. godine kome su prisustvovali predstavnici općinskih službi, kantonalnog i općinskih udruženja taksista u Zeničko-dobojskom kantonu i Sindikalne organizacije taksista općine Zenica, pri čemu je zaključeno da Odluku nije potrebno mijenjati te da je probleme taksista potrebno riješavati spriječavanjem nelegalnog javnog prijevoza lica i jačanjem rada inspeksijskih službi.

Kako su nezadovoljni taksisti putem skupštinskih zastupnika aktuelizirali svoju problematiku, to je Zakonodavno-pravna komisija Skupštine Zeničko-dobojskog kantona svojim aktom, broj: 01-02-12975-1/11 od 27.05.2011. godine, pokrenula Inicijativu za donošenje Odluke o izmjenama Odluke o organizaciji i načinu obavljanja taksiprijevoza putnika na području Zeničko-dobojskog kantona u smislu njenog usklađivanja sa odredbama člana 10. Zakona o cestovnom prijevozu Federacije Bosne i Hercegovine.

O Inicijativi Zakonodavno-pravne komisije, Ministarstvo je dalo mišljenje, broj: 12-02-12975-2/11 od 03.06.2011. godine, koje je Vlada Zeničko-dobojskog kantona prihvatila svojim zaključkom, broj: 02-02-16283/11 od 16.06.2011. godine, i shodno Poslovniku Skupštine Zeničko-dobojskog kantona uputila u skupštinsku proceduru.

Na sjednici Skupštine Zeničko-dobojskog kantona, održane 27.07.2011. godine, tačka dnevnog reda: "Inicijativa za donošenje Odluke o izmjenama Odluke o organizaciji i načinu obavljanja taksiprijevoza putnika na području Zeničko-dobojskog kantona" skinuta je sa dnevnog reda.

S obzirom da su naprijed navedeni problemi i dalje stalno prisutni, to je osnovni razlog da Ministarstvo pokrene aktivnosti na izmjeni Odluke, te stoga predlaže Vladi Zeničko-dobojskog kantona da utvrdi prijedlog Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona i uputi ga u daljnju skupštinsku proceduru.

Finansijski efekti

Za provođenje ove odluke nisu potrebna dodatna sredstva u Budžetu Kantona.

Obradio:
Eladina Mujičić
Nađa Mišić

M I N I S T A R

mr.sci.Raif Seferović dipl.ing.

PRIJEDLOG

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj 7/10), na prijedlog Ministarstva za prostorno uređenje, promet i komunikacije i zaštitu okoline Zeničko-dobojskog kantona, Vlada Zeničko-dobojskog kantona, na ____ sjednici, održanoj _____. 2011. godine, donosi

ZAKLJUČAK

I.

Utvrđuje se Prijedlog Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona.

II.

Prijedlog Odluke iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: _____/11
Datum, _____2011. godine
Zenica

P R E M I J E R

mr.sci. Fikret Plevljak dipl.ing

Dostavljeno:

1 x Ministarstvo za prostorno uređenje,
promet i komunikacije i zaštitu okoline,
1 x Stručna služba Skupštine,
1 x a/a.